

Parlamento a aproba unanimamente presupuesto di Algemene Rekenkamer, Ombudsman y Parlamento di Aruba pa aña 2025

Ayera mainta den Parlamento di Aruba a tuma luga un reunion publico durante cual a trata presupuesto di Algemene Rekenkamer, Ombudsman di Aruba y Parlamento di Aruba pa aña 2025. Tur tres presupuesto a ser aproba unanimamente.

Presidente di Parlamento, Gerlien Croes, a informa cu Parlamentario y vice presidente di parlamento, Mervin Wyatt-Ras a hiba disertacion den e caso aki como cu miembronan di e Comision di Asuntonan Domestico ta esnan defendiendo e presupuestonan presenta. Prome punto di atencion tabata tratamiento di e presupuesto di Algemene Rekenkamer Aruba.

Parlamentario y lider di fraccion PPA tabata e unico parlamentario cu a hiba un disertacion den cual el a remarca cu fraccion PPA ta sostene tur tres presupuesto cu ta ser atendi.

Na mesun momento Oduber a subraya cu fraccion PPA a vocifera caba cu pa loka ta trata e presupuesto di pais Aruba pa aña 2025 no lo por trata esaki sin mas. El resalta cu PPA ta na altura di e retonan cu pais Aruba tin y a subraya cu diferente promesa a ser haci pa cada fraccion durante temporada di campaña cu a caba di pasa algun luna atras.

El a remarca cu parlamen-



tarionan mester para keto y analisa e presupuesto di pais Aruba pa haci e recorten necesario den e presupuesto nacional.

Esaki, Oduber a menciona, ta pa motibo cu apenas siman pasa pueblo a bolbe haya un golpi ora cu aumenta prijs di gas domestico cu 35% despues cu inicialmente a ser proponi pa aumenta esaki na 47%.

Parlamentario Oduber a indica cu e minister demisionario di Asuntonan Economico, Geoffrey Wever, tabata e minister cu a sinta prome cu eleccion y pa e motibo aki e ta haya hopi dificil pa kere cu dos luna pasa, ora cu tabata tempo di campaña y eleccion, e mandatario no tabata sa cu mester a subi e prijs di gas domestico cu 47%, di cual a aproba 35%.

Durante su disertacion parlamentario Oduber a ser interumpi pa presidente di parlamento cu a pidi e parlamentario pa no desvia di e tema y haci pregunta specif-

ico tocante e presupuesto di Algemene Rekenkamer Aruba, cual tabata e punto di atencion e momento ey.

Na esaki Oduber a indica cu con por ta posibel cu presidente di parlamento ta interumpi un miembro di parlamento durante su disertacion, cu segun Oduber a bisa, e por hiba “manera cu e kier.”

“Splica’mi, si di awor caba ta impedi pa un miembro di parlamento hiba un disertacion cu e kier hib’e con cu e kier tanten cu e ta mara na e presupuestonan. Mi no mester haci pregunta, mi por keda sin haci pregunta mes si mi kier, kiemen bo no por interumpi’mi,” el a subraya.

Presidente di parlamento na su turno a bolbe haci peticion pa si por atende na e punto di agenda ya cu tin profesionalnan presente cu tabata en espera pa wak si tin pregunta pa duna contesta.

Oduber a indica cu e no por aproba of desapropa un presupuesto cu tin consecuencia



riba un presupuesto cu ainda no a ser trata (refiriendo na e presupuesto di pais Aruba) pasobra en realidad, segun el a señala, ta cu mester trata prome e “framework” di e gastonan di gobierno, caminda e “framework” ta ser aproba y den e “framework” ta aproba e presupuestonan.

El a enfatisa cu su fraccion ta aproba e tres presupuestonan cu a ser trata durante e reunion pasobra nan kier pa e tres organonan aki, cu nan presupuesto ta bay ser aproba of desapropa, funciona manera mester ta, “manera cu gobierno no ta funcionando.”

Presidente di parlamento a ratifica cu a yama e reunion pa trata e presupuesto di e organonan aki, aunke cu ainda no a ricibi nota y no ta cla pa trata presupuesto di Aruba, pa motibo cu e reunion a ser yama den nomber di tur e miembronan di e Comision di Asuntonan Domestico, cu ta inclui sr. Oduber tambe.

Sin ningun otro miembro cu a hiba palabra, Parlamento di Aruba a proba e presupuesto di Algemene Rekenkamer pa aña 2025 unanimamente.

E di dos punto di atencion tabata tratamiento di presupuesto Ombudsman Aruba

pa aña 2025. Durante e punto di atencion aki ningun miembro di parlamento a hiba palabra y parlamentario Mervin Wyatt-Ras, den nomber di Comision di Asuntonan Domestico, a gradici tur parlamentario pa apoya e presupuestonan aki.

Alabes a felicita e Ombudsman Aruba cu awor tin presupuesto y por checuta tur locual el a bin ta planeando.

Di tres punto di atencion di e agenda tabata tratamiento presupuesto di Parlamento di Aruba pa aña 2025. Durante e punto aki parlamentario Wyatt-Ras a entrega un nota di cambio pa e presupuesto aki.

E nota aki, el a splica, ta contene un coreccion di un calculacion di locual ta trata e salarionan y esaki a ser coregi den e nota di cambio. El a indica cu mayoria miembro di e fraccionnan den parlamento ta na altura di e nota aki y a haci entrega di e nota di cambio aki pa cada miembro analisa esaki.

Despues cu miembronan di parlamento a analisa e nota di cambio e presupuesto di Parlamento di Aruba a ser aproba unanimamente, incluyendo e nota di cambio.

